



Michael Scanlan preuzeo dužnost prvog zamjenika visokog predstavnika

Danas je visoki predstavnik Valentin Inzko poželio dobrodošlicu Michaelu Scanlanu na dužnost novog prvog zamjenika visokog predstavnika i supervizora za Brčko Distrikt.

“Zadovoljstvo mi je pozdraviti gospodina Michaela Scanlana kao svog prvog zamjenika u Uredu visokog predstavnika i novog supervizora za Distrikt Brčko. Imenovanje istaknutog i iskusnog diplomate kao što je gospodin Scanlan svjedoči o stalnoj opredijeljenosti Sjedinjenih Američkih Država za stabilnost i prosperitet Bosne i Hercegovine i provedbu Daytonskog mirovnog sporazuma. Uvjeren sam da ćemo zajedno sa gospodinom Scanlanom, i u koordinaciji sa širom međunarodnom zajednicom, pomoći ovoj zemlji i njenim građanima da ostvare svoje težnje”, rekao je visoki predstavnik.

Prije dolaska u Bosnu i Hercegovinu, gospodin Scanlan obavljao je dužnost šefa Misije OSCE-a u Moldaviji i OSCE-ovog medijatora za mirovni proces u Pridnjestrovlju (od augusta 2014. do augusta 2018.).

Tokom 28 godina u *State Departmentu*, on je, između ostalog, bio na mjestu direktora za istočnoevropske poslove u Washingtonu i otpravnik poslova *ad interim* u Ambasadi SAD u Minsku te diplomant Pearson instituta u Odboru za vanjske poslove Zastupničkog doma Američkog kongresa. Gospodin Scanlan ima veliko iskustvo sa Zapadnog Balkana i zemalja nastalih raspadom Sovjetskog Saveza, uključujući rad u Ukrajini, Armeniji i Kirgistanu te Bosni i Hercegovini i Crnoj Gori, kao i u Hrvatskoj u okviru Misije UNTAES-a.